

## Diarhebion 6:20-35

### 'Y MAE GORCHYMYN YN LLUSERN'

Patrwm amlwg Solomon wrth gyfarch ei 'fab' yw mynegi egwyddorion cyffredinol – e.e. pwysigrwydd gwranddo ar y 'tad' a dilyn ei gyngor – cyn troi at faes neu feysydd penodol lle mae'r cyngor hwn o werth arbennig. Dyma'r drefn eto yn y darn hwn.

#### **Goleuni**

Mae'r mab i gadw gorchymyn ei dad - a chyfarwyddyd ei fam hefyd (20) - oherwydd wrth i rieni duwiol geisio magu a dysgu eu plant 'y mae gorchymyn yn llusern, a chyfarwyddyd yn oleuni' (23). Yn hyn o beth mae'r rhieni'n cynrychioli Duw ei hun. 'Goleuni yw Duw' (1 Ioan 1:5), a 'goleuni'r byd' yw Iesu Grist (Ioan 8:12). O fod mewn perthynas iawn â Duw, felly, bydd ei Air yn oleuni inni ar ein taith drwy'r byd, gan wasgaru'r tywyllwch ac agor y llwybr o'n blaen (Salm 119:105). 'Plant y goleuni' yw un o ddisgrifiadau'r Beibl o Gristnogion (Ioan 12:36; Eff. 5:8). Mae'r Cristion wedi ei waredu oddi wrth dywyllwch ei bechod gynt; cerdded yn y goleuni a ddaw drwy Air ei Dad nefol yw ei ddymuniad yn awr.

#### **Godineb**

Gwaetha'r modd, mae llaweroedd mor gaeth i'w tywyllwch fel na sylweddolant mai tywyllwch ydyw. Mae Iesu Grist yn mynd ymhellach: 'y mae pob un sy'n gwneud drwg yn casáu'r goleuni', am fod y goleuni hwnnw'n dangos ac yn condemnio eu drygioni (Ioan 3:20). Gwelir hyn yn amlwg yn achos materion rhywiol. Duw a greodd berthynas rywiol, yn beth hyfryd ac anrhydeddus (Gen. 2:23-25; Heb. 13:4); ond yn eu tywyllwch pechadurus mae pobl wedi mynnu camddefnyddio'r rhodd ddaionus hon. Yn adnodau 24-35, felly, cyhoedda Solomon rybudd arall rhag godineb. Dyma neges gyson yn y llyfr (e.e. 2:16-19; 5:3-14; 7:6-27), am fod tuedd i bob oes a phob cymdeithas lygru perthynas rywiol. Pwysleisia Solomon fod anufuddhau i orchymyn Duw nid yn unig yn ddrwg ynddo'i hun ond hefyd yn sicr o ddwyn canlyniadau trist (cymharer 1 Cor. 6:9-10). O gael ei ddwyn i'r goleuni yng Nghrist, felly, rhaid i'r Cristion ymwrthod â phob temtasiwn i fynd yn ôl i'r tywyllwch. Gorchymyn Duw, nid ysbryd yr oes, sydd i lywio ei agwedd a'i ymddygiad ym mhob dim.